



Telecommunications &
Radiocommunications
Regulator

PO Box 3547
Port Vila
Vanuatu
t: +678 27621
e: enquiries@trr.vu

RINGIM WAN MAN WETEM TINGTING BLONG DISTEBEM, JOKE MO TRETENEM HEM (HOAX KOL) HEMI WAN KRIMINOL OFENS: YU NO MAS MEKEM – ESPESELI LONG OL EMEJENSI FON NAMBA

Pablik i shud save se Vanuatu i gat sam Emejensi Seves Opereta we oli stap monitarem olgeta fon laen blong help long wan reskiu o emejensi kes.

Ofis blong Telekomunikesen mo Radiokomunikesen Rekuleta (TRR) i wantem raisem aweness abaot olgeta namba ia mo infomem olgeta sitisen blong Vanuatu abaot olgeta problem we i gat naoia wetem olgeta hoax kol we i stap go long olgeta opereta ia.

Olgeta opereta mo emejensi fon namba we i stap i gat:

Emejensi Fon Namba	Emejensi Seves Opereta
111	Police
112	Vila Sentrol Hospitol mo Ambulens
113	Faea Seves
114	Maritaem Emejensi
115	ProMedical - VEMSA

Follem kritikol neja blong olgeta, olgeta kol we i stap go long olgeta namba ia oli fri nomo, blong save assistim mo helpem olgeta man we oli stap long kritikol mo emejensi kes blong save kasem stret Emejensi Seves Opereta we olgeta man ia i nidim help mo asistens blong olgeta.

From se ol emejensi seves ol I kritikol seves, ol kol i ko long ol eni emejensi namba hem I fri nomo, blong assistim mo helpem eniwan we I stap long wan kritikal mo emejensi kes blong save kasem ol stret Emejensi Seves Opereta we hem i nidim help mo asistens blong olgeta.

Problem we yumi stap lukim naoia mo we i no stret, hemi abaot samfala man we oli stap abiusum gudfala seves mo asistens ia we i stap, mo oli stap distebem olgeta Emejensi Seves Opereta blong mekem gud impoten wok blong olgeta.

Wanem nao samfala man i stap mekem taem oli ringim olgeta emejensi namba ia?

Hemi sad blong lukim se i gat samfala man we oli stap abiusum system we i stap mo tekem janis ia blong kolem olgeta namba ia wetem *tingting blong mekem joke (hoax)* blong spolem, distebem mo samtaem

blong tretenem olgeta emejensi opereta. Fasin ia hemi wan kranke fasin blong mekem mo hemi wan kriminol ofens tu.

TRR i wantem wonem ol kaen man olsem ia se kaen fasin ia hemi wan kriminol ofens anda long Loa blong Telekominikesen [Cap 206] mo sapos we kot i faenem se yu gilty, bambae yu save pem wan faen o yu save go long kalabus.

Long 2012, TRR i bin mekem tu (2) Desisen we oli givim pawa long olgeta telekom opereta (olsem TVL mo Digicel) blong oli diskonektem olgeta mobael fon namba we oli stap mekem olgeta hoax kol ia i go long olgeta emejensi namba. Aksen ia i save happen afta ol I sendem wan woning i go long olgeta man ia, tru long text mesej, blong talem long olgeta blong stopem olgeta hoax kol ia. TRR i stap enfosem olgeta Desisen ia finis mo bambae hemi mekem sua se evri man we oli stap mekem hoax kol oli mas fesem wan panishmen.

TRR i wantem infomem evri sitizen se taem yu haetem namba blong yu mo yusum “private” o “unknown” namba blong mekem ol kranke kol wetem tingting blong spolem naraman, yu no save haetem namba blong yu long olgeta telekom opereta. Olgeta we oli stap mekem olgeta hoax kol oli mas save se olgeta telekom opereta i save diskonektem mo saspenden fon namba blong olgeta from we TRR i otoraesem olgeta blong soemaot olgeta fon namba long ol kaen kes olsem.

From wanem nao i gat ol kaen strong aksen olsem?

Pablik i mas save se evri taem we i gat hoax kol blong distebem olgeta Emejensi Seves Opereta, laef blong ol man we oli nidim emejensi asistens, laef blong olgeta emejensi opereta we oli stap hariap blong go long eria we oli ting se i gat wan emejensi long hem, laef blong olgeta narafala sitisen mo laef blong olgeta draeva long road oli stap tu long denja.

Yufala i rili wantem se olgeta reskiu team mo olgeta medikol seves oli diskonektem olgeta emejensi fon mo ignorem ol kol? NO – from we fulap laef bae oli stap long denja mo yumi rili nidim emejensi seves!

Olgeta we oli stap mekem ol hoax kol ia oli gat kranke tingting tumas taem oli ring wetem tingting blong distebem mo tretenem olgeta Emejensi Seves Opereta be oli no luk save mo rialaesem se olgeta kaen fasin ia oli no stret mo oli save fesem jastis from, from oli stap putum laef blong naraman long bigfala denja.

TRR i stap apil i go long olgeta we oli stap mekem ol kranke hoax kol blong oli mas stop nao ia. Plis yufala i mas tingting strong long wanem we bae i save happen folem ol fasin blong yufala, ol famili blong yufala (mo yufala) from we wan dei yu tu yu save nidim help blong olgeta Emejensi Seves Opereta ia, mo olgeta narafala sitisen blong Vanuatu. Sapos yu save wan man we i stap mekem ol kaen hoax kol ia, toktok long hem mo talem hem blong i mas stop – nao ia!!

NO MEKEM KOL BLONG DISTEBEM SPOLEM MO TRETENEM NARAMAN FROM WE HEMI AGENSEM LOA. KAEN FASIN IA I SAVE MEKEM SE MAN I LUSUM LAEF. Sapos yu mekem, bambae yu lusum SIM kad blong yu mo bambae yu fesem wan panishmen.

Sapos yu wantem karem moa infomesen, yu save kontaktem Ofis blong Telekomunikesen mo Radiokomunikesen Rekuleta long fon namba 27621 o yu save go long websaet www.trr.vu .